

Parlamento di Aruba a dicidi...

Betico Croes nombra como personahe di siglo

ORANJESTAD (AAN): Partido MEP a trece un mocion dilanti den Reunion Publico di Parlamento ayera, y unanimamente e 21 miembronan a vota pro pa Betico Croes worde nombra como Personahe di Siglo.

MOCION

PARLAMENTO DI ARUBA awe den un reunion publico, dia 22 december 1999

CONSIDERANDO:

- cu mas di 50 aña Aruba tabata tin e anhelo pa ta liber
- cu na 1971 un movimiento bao liderazgo di sr. Betico Croes a ser tanta pa cumpli cu e deseo di e pueblo Arubano
- cu sr. Betico Croes na un manera decidido a sa di unifica e Pueblo Arubano
- cu sr. Betico Croes hunto cu su organisacion politico a aproba den Consejo Insular Aruba su himno, bandera y orthografia, simbolonan di union y libertad
- cu bao liderazgo di sr. Betico Croes a protesta, demonstra y tene accionnan desde 1971 y a manifesta na 1977 hunto cu su pueblo contra un gobierno cu no a respecta e electorado Arubano, cu tabatin como consecuencia cu Hulanda y gobierno Antiyano a sinta na mesa cu Aruba pa delibera riba e libertad di Aruba,
- cu sr. Betico Croes durante e conferencia di mesa Rondo 1983 na Hulanda y bao di su liderazgo una bez mas a demostra cu e ta realmente un estadista y un persona tactico, logrando e deseo tan anhela di e pueblo Arubano, esta su reconocimiento di su derecho di autodeterminacion, unda a keda palabra cu entrante 1-1-1986 nos lo haña un Status Aparte,
- cu dia 6 di mei 1998 por medio di un mocion den parlamento, parlamento unanimamente a bai di acuerdo pa decreta sr. Betico Croes como Aruba su Libertador.

TA DICIDI:

Como reconocimiento y aprecio pa e tremendo labornan ejecuta ariba e.o. tereno estatal pa nombra nos libertador Gilberto Francois "Betico" Croes como e personahe di e siglo

Sigur e reconocimiento y aprecio aki pa e bon labornan checuta riba e.o. tereno estatal, libertador Gilberto Francois "Betico" Croes merece e titulo aki. Aki DIARIO ta reproducir e mocion den su totalidad, pa asina pueblo di Aruba por corta esaki y warde como algo historico.